

中華民國二十年六月

安東縣志

王介公



志

安東縣志卷八目錄

人物

名宦

鄉宦

鄉型

文學

術藝

孝子

烈婦

節婦

貞女

賢淑

義男

流寓

衛生

慈善

軼聞

編修者姓名

安東縣志卷八

人物

名宦

同 吉 字象謙清宗室也同治末爲鳳凰城城守尉時賊匪宋三好盤踞大東溝黨羽甚衆抽木砍葦墾荒諸利任意收取釐居民不得寧處公兩次請兵擊走之東溝悉平居民感其德行光緒二年共立德政碑於九連城鎮東山下

甯海增生林明軒同公德政碑

美哉洋洋乎恩何隆歟德可盛歟非清廉明敏聰慧忠誠以不忍人之心行不忍人之政者曷克臻此有如我大人同公者宗室也以貴戚而知民隱好施無已樂惡不倦飢由己飢也溺由己溺也與古之所議親臣者何異茲以鳳城邊外先是固無居民即間有壹二家亦在旗之失業者耳目徐匪竄擾

山東遂令民等扶老携幼奔逃海北始嗷嗷於曠野繼僕僕於荒山與木石居與鹿豕遊雖有仁賢烏知其憔悴耶矧爾時愛之者無其人而害之者不綏之者無其事而虐之者更繁斯即不議不論而從其便而惴惴於王化之外既畏賊復畏兵實以數年來愈安私據尙不知究竟之罪如何敢望有今日之安樂乎哉乃何幸而同公來臨睹茲形狀惻然動念周詢遍訪不憚勤勞孰爲善孰爲惡罔不真知何以除何以安俱有良策因而帥師勇往先擒不法之徒旋即示諭詳明概免無辜之輩旣使之宅爾宅而佃爾田且爲之緩其征而薄其稅蓋猶是防禦也威不及庸衆猶是官守也刑不加愚氓汙俗咸新民風丕變此其恩爲何如恩此其德爲何如德乎故凡高田下土山陬海隅一時之黃小中丁莫不懷誠歸命欣欣然互相慶賀而謂吾儕小人猶得爲子民者其同公之力也夫於是乎要荒之處林總之儔感戴不忘願流芳於千古稱揚未已窃興頌於五言爰拜手稽首而咏之曰自古種仁人同公實愛民疆場初霽雨邊地忽生春德厚公思集恩深伯擬郇因知歌頌久無世不尊親

陳本植 字海柵四川合江舉人精明強幹勇於任事光緒元年以直隸候補道經奉天將軍崇實奏調來奉委辦大東溝善後事宜時際賊匪

初平民未安謐公體察情形無論旗民凡任地開墾者概令升科永遠承種相度地勢建設縣治撫綏經畫咸得其宜居民安帖同心感激二年五月旗民人等公立德政碑於縣治東北二十里九連城鎮東山之麓以頌其功三年任東邊兵備道兼練軍翼長綏靖有方邊民樂業五年創建啟鳳書院於鳳城招轄縣士子肆業其中誘掖獎勵多所成就邊鄙之地人知嚮學者由陳公倡其教云

甯海庠生林毓秀陳公德政碑

於鑠哉純熙之時浩蕩之恩馨香之治誠以仁政下施歡聲四起下無紛競之風上有廉明之吏德化洽乎要荒高厚同於天地故如寬猛相濟教養兼至我大陳公者既已立夫鴻勳自當宣其盛事誠即今時之樂利追思昔日之艱雖猶記來從山左實因變起河南人烟稠密已難保賊匪擾亂何能安遂扶老而携幼亦啼飢而號寒辭故鄉而不顧適異土而誰憐如斯而逃避遠東猶爲赤子無奈而潛居

邊外未睹青天况夫千峯萬壑處處堪驚野渚共寒雲一色林鴉與哀雁齊鳴可惜小民舍身雜處那堪逆匪結黨橫行初惟相假繼則相爭始猶詐物求財無論晝夜終乃催糧逼稅不畏誅刑夫所恨者強徒真不知死而宜恤者庸衆何以爲生且謂東至朝鮮西界鳳城無老無少何重何輕概行屠戮海外截一掃塵氛天下平嗟嗟本無辜兮何弗赦宥誠有罪兮尙其哀矜幸我陳公全營翼長念切仁慈情關草莽帥師北出雞犬不驚持節東征人民無恙干戈內業已親臨寇盜中亦曾獨往旌旗動而羣獸奔刀斗鳴而衆山響軍威之盛若轟雷功成之易如反掌莠爲除而良爲安惡則罰而善則賞真復作之伊萊實再生之日望則當斯際者歡無極樂無央安其業守其常暉々如無所事欣欣然無以償用拜手稽首而頌之曰陳公出師女東方愛民如子視如傷天生大才且忠良竭誠盡瘁邦家光福履成之壽而康子子孫孫百世昌羣黎感戴不能忘爲勒諸石永流芳

唐敏字哲臣漢軍正黃旗人講求吏治軫恤爲懷光緒十年署奉邊兵備道督理中江稅務親蒞沙河鎮查有落地稅病民累商立予裁革出示曉諭商民德之爲立碑於天后宮中以誌德政

鳳城恩貢曲慶平廣道德政碑

憶昔咸則三讓成賦中邦後聖有作未有不緩征薄稅子惠元元者也茲自沙河招商立鎮建官惟賢而商賈雲集者車擊轂人摩肩裕國課而厚民生於斯爲盛地名區惟常貢正稅而外偶添落地雖爲一時權宜而商民不勝其累幸逢哲翁廣道憲大人生輶伊始軫念農商利莫不興弊固弗除心存取民有制之規首裁落地重捐之稅且徵諸民間者無不去繁苛就簡寬所由遐邇歡欣蒼赤愛戴願佩服而莫罄欲頌揚而無體爰勒貞珉以誌鴻功於是乎書

附論裁革稅課以蘇民困示

照得糧船貨捐原爲練兵籌餉藉資保衛閭閻必須便於商民庶可垂之久遠本道講求吏治軫恤爲懷自蒞任以來博訪輿論凡有病民累商之事無不立予革免曾將船貨捐內大柴木炭瓜菜蔬等類稅課分別出示嚴禁今本道親蒞沙河鎮查有落地稅一層民瘼攸關亦須裁革以示体恤爲此示諭所有本道稅局落地稅即行裁免爾商販人等經此次明示之後亟宜和平公道所有買賣減價交易勿得仍以稅重爲詞圖獲重利致干究懲總期實惠均霑勉體本道求治愛民興利除弊之苦衷各宜懔慎勿違特示

張錫鑾 字金波浙江錢塘縣人智謀胆畧學識兼備光緒中由知縣薦升東邊道旋因事去光緒癸卯冬重蒞道任紳商鼓舞翌年日俄戰起地當其衝維持中立民賴以安三十二年安東開辦商埠兼開埠局總辦創設海關議免重徵商民稱便任滿升署度支司民國成立官至奉天 上將軍

錢鑠 字紹雲江蘇陽湖人光緒壬午舉人工文詞心殷教育光緒三十二年奉委開辦安東及大東溝商埠三十三年署東邊道創立師範傳習所公餘之暇輒往以課師生之勤惰又設警察以衛商埠置市場以挽利權募水師以防海盜百廢俱興商民悅服宣統元年再署興鳳道創辦水上警察以維航業而保江權至今賴之刊有歷史課本小學

模範二書爲教授之準繩焉

王順存 字理堂河南商城舉人任三省清鄉督辦性嚴峻疾惡如讐見不善者誅之若鷹鸞之逐鳥雀也民國十年四月署東邊道以鴨江流域各縣綿互千除里道路崎嶇恒苦消息不靈乃創辦安臨長途電話由安東經寬甸輯安以達臨江計線路九百六十五里通電地點共二十有一處均按路程遠近收費商民稱便又爲改良安東全埠市政起見十年十月創設市政會及市政事務所十二月發起勸募本埠及外縣紳商股本一萬五千圓創設東邊時報社以爲啓迪社會發揮民權提倡實業振興教育援助外交之機關在任三年多所建設十二年冬以中日商辦鴨綠江水電公司於我國權民生貽害匪淺力請取消拂

上憲意坐是去職士民惜之然地方實受其賜矣

黃慶階 字深父山東濟寧望族也初以優廩貢生選授高密縣學教諭
嗣洩保知縣直隸州知府歷宰北洋豐潤東光天津冀州開州等州縣
旋充陸軍第四鎮執法官調任天津巡警局總辦家學淵源凡詩賦古
文辭靡不擅長其爲人也識卓見遠志潔行芳其治事也沈毅而機敏
英明而寬大守因材器使之格言具當機立斷之妙用綜其生平從事
於政界者可三十載而其官遊吾安前後亦幾十二年之久此十二年
中可分爲三時斯一爲總辦安東商埠巡警時期(三年有奇)一長安
東地審廳時期(近二載)一長鴨渾兩江水上警察時期(七年弱)按其時
以長水上警察爲最久論其事實以辦辦商埠警察爲最難蓋安東商

埠警察開辦之初正日俄戰事甫經告終之際人民顛連瘡痍滿目地
方諸政又諸凡待舉而日軍之留駐於埠內者尙復不少恣睢爲雄時
以戰勝餘威相欺凌且埠內衝要地點日本警察皆設有出張所越俎
侵權之事日有所聞並有日本浪人每在街頭巷尾設置一種類似賭
博之營業妨害秩序不受我之法律制裁時起衝突外交方面已極棘
手更兼我方駐防埠內軍隊爲收撫之忠義軍野性難馴動輒滋生事
端因苦法律之束縛認保衛爲干涉對於警察尤爲嫉視試舉一事以
爲証當開辦之翌年春有該營軍士在梅香館娼窑滋鬧適警局探訪
隊薛隊長巡邏至該處向前排解不服日遷怒焉嗣復糾衆在興隆街
將該隊長用刺刀等武器攢毆當場斃命其野蠻於此足徵一斑矣而

公則外而據理交涉內而和衷共濟幾經艱鉅卒能使中外輯睦胥受範圍他如修馬路以便利交通建房屋以振興市面稽戶口以驅除奸宄設屠獸場以重衛生籌辦房捐舖捐妓捐戲捐各類車捐以裕餉源時未期年規模已燦然大備蓋公本爲政在人之精神凡屬局內外各科各隊各區一切重要職務皆由津奉兩處選調熟諳警政人員分任之若林君國楨(曾知安東縣事)陶君守正(曾任安東商埠兼鄉鎮警務局長)高君雲崑(曾任安東商埠警察廳長及黑龍江省警務處長現充呼海鐵路工程局長)俞君榮慶(曾知臨江安東縣事)金君世銘(曾任安東縣警務長)等其尤著者也是時華北警政以北洋爲模範而安東警政又足爲全奉冠後之來者蕭規曹隨繼續進展至今猶利賴之其長安東地審廳之爲時雖未滿二載然當開辦之

初籌廳址編預算調派人員部署職務幾費經營始具有蔚然可觀氣象仲尼曰聽訟吾猶人也而公則發伏掘奸明察秋毫真有片言折獄之才至對於疑難案件尤能詳人所畧多所平反以故民無冤抑案無留牘向之一訟牽累十家破產之惡化固已弊絕而風清所謂口碑載道民到於今稱之公實當之而無愧焉未幾公復奉委總辦鴨渾兩江水上警察事宜按該局初爲木植營業警察範圍極小設備亦不完善僅爲保護木業之一機關而已公以鴨江流域爲國際河流時時牽涉外交若不預爲之計恐江上航權將來難免爲外人所操縱乃呈請列憲改組爲鴨渾兩江水上警察總局並擴充警額添置巡船延長轄境上抵長白下抵江口沿兩江重要地點分設第一第二第三第四第五

各署及各分署一面並與沿江各縣警團治商相互聯合共維治安綜
合轄境二千餘里水上警備棋布星羅分配治臻完密自茲以往微特
夏秋之際營木業者胥隸帡幪之下即沿江居民以及往來行旅莫不
隱受其福而江權所關尤於無形中保持匪渺並因江水連年氾濫凡
木植之漂流牲畜財物之損失爲數動逾數百千萬公每當霪雨連綿
洪水行將漲發之時即預期令飭沿江各署先事籌防並傳諭居民人
等早爲遷避或設法防範臨事則督率警士招僱船隻巡行埠內分別
救護賑濟俾免有流離失所之歎復陸續擬訂管理河川交通及船舶
航行江上與夫碇泊碼頭各項規則數十條以資遵守而保安全此公
之治理水警之大略也洎民六經直督調赴北洋贊襄機要始去安士

民攀轅不獲至今惜之顧公之在安雖迭經量移第始終兼負外交責
任初兼任安東大東溝兩開埠總局提調嗣兼任交涉處處長當清宣
統三年秋革命軍之起義武昌也適爲公總辦鴨渾兩江水上警察兼
交涉處處長之時期各省響應有風起雲湧之勢而革命同志之來安
運動者亦大有人在彼時衆議紛紜多持歧路徘徊之態度公乃獨秉
卓識抒偉論謂安埠密邇東鄰措施稍有不當卽啓外人干涉爰創辦
安東保安會卽以各界人士分任會中識責以安定社會之人心以保
持地方之秩序雖蒞安各革命同志未能達到完全獨立目的而公則
竭全力以維持調護之俾得從容來去未蹈危險其保全我安東及我
革命同志者實有足多焉

(按當時僑安有蕭葛二子因與蒞安革命諸同志有所接洽爲軍

警捕獲送案建議者擬置之法公力爭卒保全二子生命查)

此乃我安東革命歷史中

有價值之事實故附述於此

附黃公德政碑全文

此碑現已移植于遠抱山公園內燕宜亭前蓋欲藉以昭示來茲永垂矜式之意云爾

蓋聞偉烈豐功史冊有常昭之典飲和食德閭閣留去思之碑方今國家設立巡警原爲保衛治安排除禍害維持公共之安寧秩序限制個人之違法自由關係憲政之基礎直接人民之地位警務固至難且重也無如有治法必賴治人得其人則事治無其人則事敗近日之辦理警察者往往利少害多卒鮮成效其故維何由於無治人故維我黃公寧足多乎黃公名慶階字深父山東濟寧人由優廩貢生初任高密縣學教諭不甘小就投筆從戎於光緒三十二年蒙前